

# Yu Xa'axxt'utunu' Karta yu Ts'oqlhi ni Juan

## Ni Juan mastak'ay ni Gayo

**1** <sup>1</sup> Kit'in, yu xa'ay kunita siya yu talhakapu'an, va ikmastak'ayan ni uxint'i, Gayo, yu kilaqaj k'at'i. Laqsaval ikpaxkayan.

<sup>2</sup> Kint'alaqajun yu ikpaxkayan, kit'in iksk'in Dios por uxint'i para ox k'ats'uk'u y jantu k'at'a'an'at'i, vachu va tacha ox alint'a kun Dios la melhanuti. <sup>3</sup> Ayaj klhi'achantajul tejkan takilachil lati ket'alaqaunink'an. Kintalaqpute'enil ni ox vas t'aylhip'in la ixtin Dios, vachu laqsaval mak'ay yu najun. <sup>4</sup> Yu apalay kixtaqniy achati va tejkan ijqasmat'a ni kes'at'an tatijuyanal makanan yu laqsaval paxtoqniy.

<sup>5</sup> Kint'alaqajun yu ikpaxkayan, ox t'aylhip'in la milhakapu'ati tejkan jalaq'aqt'ay'uy ket'alaqaunink'an yu talaqchin yu maqati machaqan mas jantu jalaqmisp'ay. <sup>6</sup> Yu'uncha aniy talaqpute'enil ixlapanakni Dios ni uxint'i ayaj jap'axk'anan. Chavay kat'aylhip'i jalaq'aqtayjun ket'alaqaunink'an la ixtin k'an chuncha tacha paxtoqniyan k'at'ap'ats'anin ni Dios. <sup>7</sup> Ni yu'uncha maqati tati'ukxuntayay para kamispakal ixtaqa'uti Jesucristo. Jantu task'in ni kata'aq-tayjul lapanakni yu jantu talhakapu'an. <sup>8</sup> Xlhiyucha kijnank'an maqsk'iniy ka'aq-tayjuu. Ex chuncha jat'atapatsayau yu vas talaqpute'ey yu laqsaval maqsk'iniy.

## Jantu ox yu makal ni Diótrufes

<sup>9</sup> Kit'in klaqts'oqnil taun chivinti ixlapanakni Dios yu ancha tivilanal. Pero ni

Diótrufes va maqamay ay kamakakal. Jantu kintalaqa'iyen. <sup>10</sup> Xlhiyucha incha kajk'ananta, kakjunta'iyen para kakhixaqalal yu makay, va kilunt'ajun laqxtoqnu, kintamanuniyan laklkanti. Jantu vamuncha yu'. Vachu jantu jalaqa'iy tejkan tacha'an yu talhakapu'an. Yu talaqa'iputun jalaktanchaniy para jantu kata-laqa'il. Ex jalaqtinaqxuy para jantucha ch'antaun kataval kun yu alati yu talhakapu'an.

<sup>11</sup> Kint'alaqajun yu ikpaxkayan, jantu kalaqts'i'it'i yu jantu laj'oxi, va kalaqts'i'it'i vamun yu laj'oxi. Yu makay yu laj'oxi, yucha tijuyal kun Dios, pero yu makay yu jantu laj'oxi, yucha jantuka' mispay ni Dios.

## Ox yu makay ni Demetrio

<sup>12</sup> Tachun tanajun ni Demetrio va ox lapanaki, si makay tacha najun ni chivinti yu laqsaval. Mas kijnank'an vachu iknaunau ni Demetrio va ox makay y uxiknan k'ats'ayat'ik ni jantu klaklkananau.

## Jamastak'achoqoy

<sup>13</sup> Kit'in ayaj lhuu chivinti xajkunputunan pero jantu ikts'oqniqputunan kun pats'oqnu. <sup>14</sup> Va ikpaxxan'iy niman kaklaqts'in ex kalakchivananau ukxpu' kun ukxpu'.

<sup>15</sup> Oxamaktaun k'at'a'ul. Yu mint'alaqaunin yu aniy ta'alinta tamalaqachaniyan taun jamastak'anti. K'alakmast'a-k'at'i ni ket'alaqaunink'an por qayntamin yu ancha ta'alinta.